



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

**Donald Trump ya ozüing alemer
ka lir: Ayatollah Ali Khamenei**

**Lin Chun-Yi, An Se-Young nati
India Open kokogo**



VOL. XXIII ISSUE NO. 96 (ADOK 96) DIMAPUR TENTONÜ (MONDAY) AENJETI (JANUARY) 19, 2026

₹ 5.00

Gaza atema 'Board of Peace' nung Donald Trump-i India adentsü jaoker

New Delhi, January 18, 2026 (Agencies): Gaza atema "Board of Peace" nung shilem agitsü atema US President Donald Trump-i India jaokogo.

Israel aser Hamas tsüingda ceasefire agreement shilem tanabuba nung shilem ka ama Trump-i "Board of Peace" metetdakja liasü. Iba telok yagi Gaza nung governance, reconstruction, investments aser capital mobilization ketdangsüa reprangtsü.

"President Trump-i Board of Peace for Gaza nung adentsü atema India jaokogo" ta osang ka ajanga ashi.

Trump-i Board of Peace nung Prime Minister Shehbaz Sharif adentsü jaokogo ta Pakistan Foreign Office said-i sangoktsüba sülen ghonda ishika lir India-ia iba osang metetdakja liasü.

Trump-isa Turkiye President Recep Tayyip Erdogan, Egyptian President Abdel Fattah el-Sisi, European Commission President Ursula von der Leyen aser France, Germany, Australia o Canada nungi lennirtemi iba board nung adentsü jaokogo.

Board of Peace ajanga Middle East nung yimjung bener arutsü aser Global Conflict angatetteptsü atema tasütait mapa inyaksü ta Trump-i Argentina President Javier Milei aser Paraguay President Santiago Pena na dangi züluba shidi nung shia lir.

Trump'er sorkari linük 60 shi ka nem draft charter yokba nung board züngsemtemi küm asem den teimba züngsem linüra \$1 billion agütsütsü ta shia lir.

"Board of Peace ya international organization ka lir aser iba ajanga rara adokba tesemtem nung tensa süngjemtsü, ozüingi melaba ketdangsübaren bener arutsü aser yimjung lidaktsütsü atema inyaksü" ta osang ajanga ashi.

Iba board founding executive members nung taoba British prime minister Tony Blair adentsü ta Trump-i Honibarnü metetdakja liasü.

Trump-isa ashiba agi founding executive members nung par jala kinungbo Jared Kushner, US secretary of state Marco Rubio, US special envoy to the Middle East Steve Witkoff aser World Bank Group President Ajay Banga nunger adentsü.

White House-i ashiba agi Trump menden ser main board ka nung Palestinian committee of technocrats alitsü aser parnoki rara aliba tesem ketdangsütsü. Iba sülen "executive board" tanabuba ka alitsü aser iba telok yagi advisory role agütsütsü ta White House-isa metetdaksü.

Iba Board of Peace ya January 15, 2026 nü tentet aser iba ya Trump-i Gaza atema 20-point peace plan nung shilem ka asütsü.

Centre-i Manipur atema mebilemstür: Congress

Imphal, January 18, 2026 (Agencies): Tesüiba küm pungu tashi BJP-i aniba Centre sorkari Manipur nung tim mesüi ketdangsüa arur aser iba ajanga rongsenketzüng aser security tebilemstü bentsür aruogo ta Congress-i tai tongloktsü.

"Manipur nung kechi atalokogo iba atema sasaa bilemer. Tesüiba küm pungu tsüingda parnoki state tim mesüi ketdangsüa aru. Rongsenketzüng tia kanga mejungi kümogo aser international border artsülen security khuret ajurua lir" ta All India Congress Committee in-charge of Manipur Christopher Tilak-i ashi.

Manipur nung May 2023 nungi kin o kin tsüingda mepetmesü adoker rayyonga arur. Lendenlen aliba Meitei nunere aser tenemlem Kuki teloktem tsüingda raratepa arudang nisung 260 tema taküm samaogo aser meyrirjang aika pei talidak toktür ogo.

"Centre-i tensa süngjemtsü indang jembir saka President's Rule benoka lika telungpur teloktemi bandh ayongzüka liasü" ta Tilak-i tesüiba nung pa arudang

ajangshiba osang ka lemsatsep. Centre sorkari Manipur atema süoki ia mebilemer ta paisa shisem.


Manipur nung Congress indang 'MGNREGA Bachao Sangram' campaign ketdangsütsü atema Tilak arua lir. Pa hopta ka tashi amungtsü aser idangji hill aser valley districts sema senzütsü.

"Ni Manipur nung Assembly constituency ajak nung lungkak aittsü. Ni hopta ka amungtsü aser hill o valley tesemtem semdangtsü" ta pai ashi.

Indian National Congress (INC)-i January 3, 2026 nungi linük ajungalen campaign tenzüksü osang metetdaksü. Iba ya January 10 nungi February 25 tashi agitsü aser rural employment scheme nung temelenshi, MGNREGA meyipa bener arutsü aser panchayats nem tashi talila agütsütsü atema parnoki takhangba agütsütsü.

"MGNREGA tenüng aser inyakyim melenshiba magizüker. Iba scheme ya 2005 küm UPA-i yimdaklirtem, talisa tetsürtem nem tashi agütsütsü nükjidong nung tenzük" ta Tilak-i ashi.

PM Modi-i Assam nung Amrit Bharat Express 2 tenzüksüogo



Guwahati, January 18, 2026 (Agencies): Northeast nung rail connectivity tajungba akümtsü atema January 18 nü Dibrugarh-Gomtinagar-Dibrugarh Amrit Bharat Express aser Kamakhya-Rohtak Amrit Bharat Express tenzüksüogo.

Prime Minister Narendra Modi mangdang kübok non-AC Amrit Bharat Express ya tenzüker aser pai video conferencing ajanga tenzüksüogo.

Deobar nikongdang 6:00 ako meta Divisional Railway Manager, Lumding Division ketdangsüba kübok launching service ka agia liasü.

Amrit Bharat Express ya tanü putu den putepa yanglu saka

senotsü tajemba agitsü. Iba train nung advanced safety features aika lir aser iba ya non-AC coaches nung mezüing atema enokba lir.

Dibrugarh nungi Train No. 15949 ta ser iba weekly service ajanga Assam kübok Dibrugarh nungi Lucknow, Uttar Pradesh kübok Gomti Nagar den sendakteptsü. Iba train ajanga Assam, Nagaland, West Bengal, Bihar, aser Uttar Pradesh state tem süitsü.

Iba non-AC Amrit Bharat Express ya Diphu, Lumding, Dimapur, Guwahati aser tanga tongtipang station tem nung anenzüksü aser iba ajanga Northeast nung inter-state

mobility tajungba akümtsü.

Diphu nung train tenzükba sentong nung Lok Sabha MP Amarsing Tisso-i tetushi süa jaoker ama shilem agia liasü.

Sentong nungsa Diphu MLA Bidyasing Engleng, Karbi Anglong Autonomous Council (KAAC) executive member Ritesh Enghee, Railway ADM, Lumding AK Pandey, APRO, Dimapur Abhijit Das aser tanga ketdangsürtem aden.

Indian Railways-i affordable, safe, & reliable long-distance services tenzüksü tebilemba den Amrit Bharat Express ya kanga puteper, aser iba ya talisa Assam aser Northeast amala tesemtem atema kanga tongtipang lir.

NPF lennirtemi telongjem aser tashi angatsü nenshir

Dimapur, January 18, 2026 (TYO): January 17, 2026 nü Naga People's Front (NPF)-i 7th Mile nung Chümoukedima Division Office lapokogo.

NPF Secretary General & MLAAchumbemo Kikon-i office lapoktsü aser sentong nungsa ketdangpurtemi tezüngzüktep agia liasü.

"Political office ka lapokba ya tashi angaba, tebilemstü khuret abenba aser telok tejakleni aoba lir. Kidang nai koma inyknür inyaker aser koba jembinür jembir, saka office ka telungi aidang na iba office aser office discipline jagi alenbanger" ta Achumbemo Kikon-i ashi.

NPF ya October 21, 1963 nung tenzük aser idangji Democratic Party of Nagaland (DPN) ta tenüng aja, ajisüaka küm 60 tema süia aruaka motto Fide Non Armis ("By faith, not through arms") melenshi aser party antebong maitsü ajanga Naga nunger nem maneni teimla agütsür ta paisa ashi.

"1964 nung mezüingbuba State elections agidang party-i menden 12 nung takok angu aser September 6, 1964 nü Naga telungpur teloktem aser India sorkar tsüingda mezüingbuba cease fire sign sütepba sülen party MLA ajak anena liasü. Tanübo yamaji bendanga

agütsüba mangashidanger. Party ya Naga tebilemstü aser yimjung atema tenzük" ta Achumbemo Kikon-isa ashi.

"NPF küm 60 ajungba tenüng nung yaküm October 21 nü regional party ana ka kuma loktepba ajanga Naga nunger longjemba sayur. Chief Minister Neiphiu Rio lenisüba kübok party-i tesem balala nung Naga nunger longjemdaksütsüsa inyaktetogo. NPF ya regional party ka lir saka iba party-i küm aika Nagaland nung non-Naga minorities temetentem kümzüka arur" ta paisa metetdaksü.

"Nagaland nung alirtemi NPF nungi aika imlar anungji party lennirtemi pei kija ajangzüksü atema party office tenüng menüka meinyaksüla. NPF züngsemtemi telok asoshi senti akümtsüka aser party tashitaitba kuma aotsü atema mapang agüja shilem agitsüla" ta Achumbemo-isa ayongzük.

"Nagaland sorkar nung MLA 34-i state renloktsüba den Naga yimten tebilemstü atema bangzüng renemogo. Party-i tebilemstü bena aser tashi angaa külemi inyaka aotsüla aser public taginübatem tongtsütsüla" ta paisa ashi.

Chümoukedima Division Office lapokba ya teküpoktiba jenjang nung NPF-NDPP

loktepba takok anguba sayur ta Zhaleo Rio-ia ashi.

State lenisübai iba maparen takok ngua inyakba atema tenüngsang agütsür aser division tentetba ya kanga nüngdaker kechiyong Chümoukedima-Dimapur ya political aser demographic zone tongtipang ka lir ta pai ashi.

"District kar nungbo unit tem loktepba sülen tanishirtem shimtsüba nung mangatettep adoka rarateper, saka Dimapur area nungbo iba tebilemstü mali. Dimapur ya mini Nagaland lir aser Naga nunger sentepdak nungi telongjem adoktsüla. Party züngsemtemi division aser assembly constituency levels nung amalitepa inyaksüla" ta Zhaleo Rio-i ayongzük.

Naga nunger taintem aser shisakartemi regional party ana loktepba pelashishia agizükogo aser wadang ajak nung Naga nunger longjemtsü tatishitsü sayutsü ayongzükgogo ta paisa shisem.

Iba sentong nung Vice-President (COB) Phushika Awomi menden liasü, Chümoukedima Town Baptist Church Pastor Mhasivizo Puchoi temoatsü meshia sarasadem aser senior vice-president Charlie Sekhose-i tezüngzüktep agidaksü.

CCRCFA 4 buba inti mungdang tembangogo

Dimapur, Aenjeti/January 18 (TYO): Chakhesang Christian Revival Churches Fathers Association (CCRCFA) 4 buba inti mungdang Local Ground, Chetheba Town nung Deobarnü tembangogo.

Ananü mungdang ya Phek district kübok CRC Chetheba Town ajanga ayongzüka liasü.

Deobarnep tekülem sentong nung Advisor, CAWD and Taxes, Kudecho Khamo-i salem o jembi aser tebu tem teinyaktsü mapa tulu lira ser kibong nung tebu tem ya Tsüngrem den atongba amai züngshir ta ashi.

Kibong ka nung tebu tem ya pastor ka ama lir, anungji tebu tem Khrista dak tera ayangtsüla, tamang nung amendaktsüla, Laishiba ya cement ama asütsüla aser sarasadem nung ajemdaktsüla, ta ashi.

Alima tesem ajunga nung tongtipang telemtetba agitsü nüngdaker, aser tamangba tsütsü tebilemtsü lir aser aji koktettsü atema sentong nung adener ajunga Tsüngrem den mezüng tesendaktep yanglutsüla, iba sülen pei kinungtsür den aser kasa mapang pei tanurtem den tesendaktep yanglua



Chakhesang Christian Revival Churches Fathers Association (CCRCFA) 4 buba inti mungdang Chetheba Town nung alidang Deobarnep sentong nung Christian Revival Church (CRC) Chetheba Town ajanga temeja ken atenba mapang tangokba noksa nung angur.

asendenshir pei kija aser kibong asendenshitsü nüngdaker, ta pai ashi.

Temelenshi ya pei dak nungi tenzüksüla, lokti, arogo mesüra sorkar dak tai metongloksütsüla, kechiaser nisung ajak yangji shilem lir, aser ibaji ajanga temelenshi arutsü, ta Khamo-i ashi.

Paisa ali rongsen nung merangloki ochishia Tsüngrem yimli nung rangloker alitsü tongtipang ta ashi.

Aiben arogo tem senotsü bendenba nung maziingi alir, sen asoshi tali bilemdang tanüla samadaktsür, anir maruteter, anungji rongsen dak masü kibong nung rangloker sarasadema Lai nung aliba ama Tsüngrem o tashi angaa tanüla

kumzüka mission mapa inyaktsü pai ayongzüka liasü.

Pai tamangertem dang arogo nung züngsem tajung ka-ka süa arogo lenirtem asoshi mapa tajung inyaka pastor aser lenirtem yaritsü ajungshia liasü. Kasa mapang pai putir tem dang tanüla kumzüka mapa maneni inyaktsü ayongzüka liasü.

Advisor Khamo-i iba mungdang nung adenertem dang tebu tajung ka-ka asütsü, kija aser kibong asendenshi lokti nung temelenshi bener arutsü ayongzüka liasü.

Iba sentong nung o jembi Rev. Zaseyi Veswuh, Chairman, Council of Chakhesang Christian Revival Church (CCCRC) ajanga tamanger ajunga dang dangari nükshitsüsa

tamang akanga alitsü ayongzüka liasü.

Ochishir, teindang, tangatetba tajung alitsüla, aser item yimya malirtem Laishiba tesayuba anema aotsü, ta ashi aser Tsüngrem agizüka amangtsü, Pa o sülen anidaktsü ayongzüka aser mapa medeni amangbaji tazüngla lir ta ashi.

Pai tebutem dang pei kidanger meimtsü ajungshia liasü.

Pai tamangertem dang yimjung meimtsü aser dangari aibelenba nung tatok agütsütsü ayongzüka liasü.

Iba sentong nung Vetacho Nienu, President, Chakhesang CRC Fathers Association menden liasü aser Rev. Veshoseyi Rhakho, Pastor,

CRC Thenyizu ajanga sarasadema sentong tenzüka.

Sentong nung CRC Chetheba Town, Khezhakeno CRC Fathers Fellowship, aser CRC Yoruba Fathers Fellowship ajanga temeja ken tem aten aser Vetsuto Dozo, Pastor, CCRC Jalukie Zangdi ajanga Lai azüing.

Nikongdang sentong nung D. Kemvu Koza, Advisor, CCRC FA menden liasü aser Rev. Senuto Ringa, General Secretary, NCRC ajanga Tsüngrem o jembi. Honibar nikongdang sentong nung o jembi Rev. Z. David Koza, Executive Secretary, CCCRC liasü.

Honibarnü choral competitions aliba mapang Veshuduyi Tetseo, Music Secretary, Chetheba Town Baptist Church; Nusakholu Dawhuo, Music Secretary, Thenyizu Baptist Church; aser Phisa Nienu, Music Director, Chozuba Town Baptist Church nungertem tetendanger liasü.

Iba mungdang nung Joshua Koza-i anir Chakhesang CRC Fathers Association ketdangpur tasentem Rev. Zhouhuyi Nyekha, Chairman, Ordination Board ajanga sarasadema shimja liasü.

Shamator nung Tsungkamnyo benjong temogo



Tsungkamnyo benjong amungba mapang MLA, Dr. Sukhato A. Sema den ketdangsertem den külemi tangokba noksa nung angur.

Dimapur, Aenjeti/January 18 (TYO): Shamator nung Yimkhiung kin anogo asem Tsungkamnyo benjong amungba January 17, 2026 nü tembangogo, kong MLA Dr. Sukhato A. Sema sentong akhumdong liasü.

Dr. Sukhato-i iba benjong nung shilem agitsü maongka anguba atema kanga pelar, koba Government of Nagaland indang tongtipang inyakyim ka lir ta ashi.

Mini-Hornbill amungtsüba tasa ya tongmelang saka tashi tulu - Naga nunger sobaliba nüburtem dangi tali anasa bener arutsü aser kin balala nem pei sobaliba tasü ita aser tejak tenteta sayutsü asoshi sapang agütsütsü atema lir, ta pai ashi.

Tsungkamnyo ya alu ruzüker amungba benjong ka lir, aser iba benjong ya küm nung tetetzü aliba mapang ka arur ta asenoki

angazüker aser meteter. Alu aruba tembangogo, ali anisüngzüker aser nüburtem adenshia benjongtsü aser tesendaktep akangshitsü mapang lir. Ibai tenüngsang agütsüba, tesendaktep aliba aser temeim sayutepba mapang ka lir, ta MLA Dr. Sukhato-i ashi.

Yimkhiung nüburtem asoshi sobaliba ya anogoshi yimya nung lir - aben-süoshi, yimya aser jembishinüba. Yimkhiung oshi ya kidang aser yimtsüngtem nung jembi, koba putu ka nungi kati otsü, shisatsü aser maitsü bener aor. Aser item ajakji pasasa aser tebour junga ka kuma lungjemba nung Tsungkamnyo ya ka lir, ta ashi.

Lanu putui tashiyim agi masü saka tangatetba nung bener aoba ajanga asen sobaliba mesamatsü, ta Sukhato-i ashi.

Pai nüburtem dang iba

benjong ya mangdang tajung yur amungtsü ayongzüka liasü.

Sumi aser Yimkhiung kin tsüngta tesendaktep tajung aliba indang bilemteta jembidang, kin ana tsüngta 1940s nungi iba tesendaktep nung aruba indang ashi.

Sema Association teyari nung 1960 küm Mark kakat Yimkhiung oshi-i meyipzüka aser iba sülen Mathi kakat meyipzüka liasü. Chessore Village nung 1996 küm Sumi Yimkhiung friendship meeting ka amen aser 2017 küm Sumi-Yimkhiung Cultural Exchange ayongzüka Yimkhiung-Sumi tesendaktep ya yimtsüng sasap nung shishilempatepa mapang ka-ka rara aliba nungi Khristan yimsü, shisaluyim aser tanü yimten ajanga tajungba kumdakja yimjung nung alir ta pai ashi.

Naga nunger kin shia asoshi

Mini-Hornbill Festival ama sobaliba sentong balala ajanga maneni yariba atema pai Chief Minister, Dr. Neiphiu Rio lenisüba kübok Nagaland sorkar dang pelaba lemsatepa liasü.

Tribal guest ama Sumi Hoho tir Dr. Vihuto Assumi-i Yimkhiung Tribal Council dang aruya aliba Ahuna benjong nung adentsü jaoka liasü.

Yimkhiung kin dak telungjem aliba ngua temulung nung kongshir aser sobaliba tajung pela agizüker, ta pai ashi aser akhi alemli mapang nungi kin ana tesendaktep tajung aliba indanga lemsatepa liasü.

Benjong ayonger Advisor, Youth Resources & Sports, S. Keoshu Yimkhiung-i tarur ajak pela agizük aser tarutsü nunga tesendaktep tajung nung alitsü imlaba lemsatepa liasü.

Asen sobaliba wazüka temaba jenjangi ajungkettsü

asoshi state sorkari Mini Hornbill ayongzüksü ajungshir aser kasa mapang sorkari sempet balala aliba lanurtem jenjang tajungba kumdaktsütsü nükjidong lir, ta pai ashi.

Pai nüburtem dang Tsüngrem matsüngdang ajemalua yimjung nung alitsü ayongzüka aser arogo tem dang lokti yangerba nung shilem agitsü ajungshia liasü.

Iba benjongmung nung sobaliba ken, tsüngsang aser jilushi balala agi tebour jungdaktsü aser Moko Koza, S u n n y m o n g b a , T o s h i Yimkhiung, Kams aser lanurtemi shilem balala agia liasü.

Iba benjong tembangba sentong nung alakteta jaoker ama K. Yimso Yimkhiung, Chairman, Nagaland Building & Other Construction Workers' Welfare Board dena liasü.

Bengal nung TMC sorkar anentsü mapang tongogo: PM Modi



Kolkata, Aenjeti/January 18 (Agencies): Amongnü West Bengal nung Chief Minister Mamata Banerjee-i aniba sorkar aija Ato kilonser Narendra Modi-i, state nung küm 15 Trinamool Congress (TMC) yimsüsüba anentsü mapang tongogo, ta metetdaksü.

Paisa, West Bengal nung temelenshi nüngdaker, kechiyong TMC-i tim mesüi yimsüsüba agi nüburtem laktetogo aser Mamata Banerjee den par party agienadokner, ta ashi.

Amongnü Hooghly district kübok Singur nung lokti senden nung jembidang Modi-i, TMC ya state nung lanurtem, tetsürtem, aluyimertem aser angopurtem atema tsükchir lir, ta ashi.

Paisa, Bharatiya Janata Party (BJP)-i dang West Bengal

nung terenlok mapa kanga kera inyaktettsü, ta metetdaksü.

Paisa, Bengal nung central schemes benoka inyaksü atema TMC-i memelar, ta aitsü.

"Tetsütem, aianutsürtem aser aluyimertem aika aruogo, aser ajaki terenlok aginüa teimla nung aru. Ajaki küm 15 tashi arem yimsüsüba melenadokner. BJP-i Bihar nung arem yimsüsüba anenja liasü aser tang West Bengal nunga TMC indang arem yimsüsüba dang salem ashitsü atema renema lir," ta pai ashi.

"Delhi nunga sorkar ka liasü (Arvind Kejriwal-i aniba Aam Aadmi Party) aser parnoki central schemes mela-a liasü. Ajisiüaka iba party ji sorkar menden nungi agienogo, aser tangbo Delhi nung gol ana aketba sorkar lir," ta pai ashi.

West Bengal atema BJP-i mapa tajung inyakba metetdakja

Modi-i, "Centre nung BJP sorkar aruba sülen ang Bengali oshi nem 'classical language' jenjang agüja liasü. Taoba mapang Centre nung Congress-i aniba United Progressive Alliance (UPA) sorkar nung TMC-a liasü, saka parnoki Bengali oshi nem 'classical language' jenjang magütsüteni liasü," ta ashi.

"West Bengal nung tashi tulu lir, yangi ayong tulutem lir, tzüyinküm talang lir, temo keta aliba li lir aser district shia nung langkabosa tajung lir. BJP-i maneni district shia itemji tashi itshidaksütsü," ta paisa metetdaksü.

"Bendangertem state telungi aitba TMC-i pusemer. Centre-i arrtsülen atsü atsütsü atema ali bushir saka TMC sorkari meyarir," ta pai ashi.

"Yangi TMC sorkari central sorkar schemes kübok nenok nem teyari magütsür. Parnoki ni aser BJP den tsükchitepbaji ni angateta dang lir, saka iba tsükchitepji ajanga Bengal nung takoksa mengudaksütsüla," ta pai ashi.

Assembly menden 294 aliba state nung March-April nung election agitsü. West Bengal dak alia taküm Tamil Nadu, Kerala, Assam aser Puducherry UT nunga assembly election agitsü.

Kerala kübok Iritty nung H5N1 Bird Flu putet

New Delhi, January 18 (Agencies): Kerala nung Kannur district kübok Iritty nung ketdangsertemi H5N1 Bird flu putetba sülen tekümdangtsü osang metetdaksüogo.

Tang tashi nungbo an waraji waru dak dang puteta lir, anungji tang-tangbo an tepseta indoktsü menüngdak, iba dak alia 'surveillance zone' mesangdong.

District Collector Arun K Vijayan-i region nung tekümdangtsü metetdaksüba den külemi department balala dang iba wara nokdangtsü atema inyaksü tuyu.

Kannur Regional Diagnostic Laboratory nung Deputy Director-i official sangdong ka ajanga H5N1 flu putetbaji metetdakja liasü.

District Collector-i District

Medical Officer aser Local Self-Government Department Joint Director dang Iritty municipality aser temeket nung iba wara nokdangtsü atema telemtetba balala agia inyaksü tuyu.

District administration telatetbatem kübok ozü/an tasü kar danga ngura ibaji municipal public health department-i calcium carbonate amshia ali tarok nung aremtsüla. Iba dak alia an-ozü tasü aremertem jagi teka semoktsü den masks aser personal protective equipment (PPE) agitsüla.

Health Department dang iba area ji junga mita alitsü aser temang metaba mesüra tangu sashiba dak sendakba nung timtem adokra osang metetdakjang, ta tuyuogo.

UP nung 86buba All India Presiding Officers' Conference agitsü

Lucknow, Aenjeti/January 18 (Agencies): January 19 nungi January 23 tashi Uttar Pradesh nung 86buba All India Presiding Officers' Conference aser 62buba Conference of Secretaries of State Legislatures & Legislative Councils agitsü aser iba sentong nung Lok Sabha Speaker, Om Birla densema lenirtem aika adentsü.

Item senden nung linük tesem balala nungi presiding officers, secretaries aser legislatures nungi ketdangsertemi legislative aser Parliamentary inyakyim, senden ketdangsüa agibaren aser junga ketdangsüba densema tongtimbang onük aika nung o lemteptsü.

Item sentong nung Lok Sabha Speaker Om Birla,

Uttar Pradesh Angh Anandiben Patel, Chief Minister Yogi Adityanath, Rajya Sabha Deputy Chairman Harivansh Narayan Singh, Uttar Pradesh Legislative Council Chairman Kunwar Manvendra Singh aser Uttar Pradesh Legislative Assembly Speaker Satish Mahana nung den state balala nungi Presiding officers, chairpersons, speakers aser secretaries adentsü.

January 19 nü Vidhan Bhavan nung iba senden tenzüksü aser January 20 nungi tenzüka onük balala nung o lemteptsü aser tatemsa January 21 nü tatembangbuba sentong agitsü.

Senden tembangba sülen January 22 nü parnoki Sabha Speaker Om Birla, Ayodhya Dham semdangtsü.

Jharkhand state nung anogo 9 tsungda shitii nisung 22 tepset

Ranchi, January 18 (Agencies): Taoba hopta Jharkhand nung West Singhbhum district kübok talisa Chaibasa aser Kolhan forest division areas nung shitii nisung 22 tepsetogo.

Jharkhand nung shitii nisung tepsetba ya tang tasen masü, ajisiüaka region ka nung hopta ka tsungda nisung 22 tashi tepsetba yabo tang mezüng lir.

Tesüiba küm 20 tsungda India nung shitii nisung amakba kanga bulua kümdar, talisa Jharkhand, Odisha, Chhattisgarh aser West Bengal state tem nung tribal nisungtem aliba tesemtem nung shitii nisung kanga tepseter.

Ministry of Environment, Forest & Climate Change-i ashiba agi, 2017 nungi 2022 küm tsungda Odisha nung shitii nisung 499 tepseta liasü, Jharkhand nung 462 tepset, West Bengal nung 385 aser

Assam nung nisung 358 tepset. 2018-19 aser 2022-23 tsungda Chhattisgarh nunga shitii nisung 337 tepsetogo.

Tesüiba küm pongu tsungda Jharkhand nung shitii nisung tepsetbaji ita sasep nung lemtsüra ita shia shitii nisung 7.7 tepsetba den kasa lir.

Taküm January 1 nungi January 9 tsungda West Singhbhum district nung shitii nisung 22 tepsetogo. January 6 aonung kija nung Bawariya yim dak shiti kati nisung 6 tepset aser January 9 nüa kasa district kübok Haldia aser Benisagar yimtsüng na nung shitii nisung asem tepset.

Iba sülen nung jagibo nütsüng 2,000 shi aliba yim dakji aonung shia nisung teri yim anüker.

Shiti jenshidaksütsü atema forest department-ia torch ana den firecrackers agütsüogo.

Jharkhand nung shitii timtem agütsüba nokdangtsü atema

tentetba "Haathi Mitra" telok tentetsang, Tapas Karmakar-i, "Odisha kübok Mayurbhanj district nung Similipal Tiger Reserve ya Jharkhand kübok West Singhbhum (Chaibasa) area den sendaktepa lir. Iba region nung shiti kanga senzür. Saranda aremi aruba shititemji aiben Chaibasa lenmangi arur. Tangbo iba corridor nung kiojen aika asür, gari lenmangtem yanglur aser terenlok mapa kanga inyakteper. Ibayongji shititemji lenmang mejangjai nemzüteper, aser ibaji ajanga nisungtem amaker," ta metetdaksü.

Jharkhand nung arem li hectare 16,000 nungbo lisem ayar mesüra terenlok mapa kanga inyakteper. Tesüiba küm pongu tsungda Singhbhum region kija nunga shitii nisung 101 tepsetogo aser Ranchi region nunga nisung 173 tepsetogo.



Uttar Pradesh nung Bareilly kübok Mohammadganj yim dak ki tazüng ka nung sarasademba atema police-i nisung 12 apuba sülen tangokba noksa nung angur. Muslim nungertem jagi temelaba magii sarasademba video ka prokba sülen January 18, 2026 nü parnok apu. Parnok bail nung chiokogo, ajisiüaka police-i maneni ano nisung asem bushidar.

**पावरग्रिड
POWERGRID**

SANGDONGER

North Eastern Region nung Bhutan nung aliba Mangdechhu Hydroelectric Project nungi Power transfer asütsü atema "Transmission System Strengthening in Indian System" kübok 2019-24 atema Transmission tariff yanglutsü aser 400kV D/C (quad) Alipurduar-Jirmeling Transmission line (Indian Portion) den Alipurduar Substation nung 02 Nos. 400 kV line bays atema 2024-29 tariff block determination of transmission tariff atema petition.

1. Tekalen shia aliba Transmission system nungi beneficiaries ji: (a) Assam Power Distribution Company Limited (b) Meghalaya Power Distribution Company Limited (c) Government of Arunachal Pradesh (d) Power and Electricity Department, Mizoram (e) Electricity Dept. of Puducherry (f) DOP, Nagaland (g) TSECL, (h) MHPA, (i) BSP(H)CL, (j) WBSEDCL, (k) Grid Corporation of Orissa Ltd, (l) DVC, (m) Power Department, Govt. of Sikkim & (n) JBVNL

2. Tariff osang tejangja:

a) 2019-24 Block		Rs. in lakhs					
Asset Detail	DOCO	Completion Cost as on 31.03.2024	2019-20	2020-21	2021-22	2022-23	2023-24
Revised AFC based on truing up							
Asset-1	24.06.2021	88577.58	-	-	9966.18	13220.73	13468.39

b) 2024-29 Block		Rs. in lakhs					
Petition No.	Asset Detail	Completion Cost as on 31.03.2029	2024-25	2025-26	2026-27	2027-28	2028-29
Annual fixed charges (AFC)							
Petition-1	Asset-1	89039.37	13175.24	12845.41	12559.08	12294.20	12017.06

3. Determination of tariff atema application copy ka applicant indang website www.powergrid.in nung angutsü.

4. Petition nung aliba determination of tariff nung tebilemba kar mesüra tashishitsü lira iba sangdong agütsüba sülen anogo 30 tsungda beneficiaries densema nisung mashie kati Commission indang e-filing portal mesüra tezüluba nung Secretary, Central Electricity Regulatory Commission, 6th, 7th & 8th floor, Tower B, World Trade Centre, Naoroji Nagar, New Delhi - 110029 nem (mesüra Commission indang office aliba tanga address nung) agüjang, iba denji copy ka petitioner nem corporate office indang address nung agüjang.

Place: Gurgram
Date: 19.01.2026

Sd/-
General Manager (Commercial)

POWER GRID CORPORATION OF INDIA LIMITED
(A Government of India Enterprise)
Registered Office: B-9, Qutab Institutional Area, Katwaria Sarai, New Delhi - 110 016
Corporate Office: Saudamini, Plot No. 2, Sector-29, Gurugram, Haryana - 122 001
Website: www.powergrid.in, CIN : L40101DL1989GOI038121

A MAHARATNA PSU

PG/CC/Notice-75/Adv-91/2025-26/Invicda



TIR YIMYIM YIMOBILEM (EDITRIAL)

DIMAPUR MONDAY, JANUARY (AENJETI) 19, 2026

Yi tongpang !

Nagaland nung yi tongpang ya Dimapur lenden nungbo yi ajemertem asoshi masü saka yi majemertem rongnung arogo lenirtem o lokti tentet lenirtem na tsüngda raraba tongpang amaika kümogo. Aji oda, arogo nungersa süaka Dimapur nung lokti tentet lenirtemibo Nagaland ajunga nung yi yanglutsü aser ayoktsü memelayonga Dimapur district nungbo yi ayoktsü melatsüla ta temepishiba olen masü saka takangba ken o agüja lir. Tetezü, Dimapur nung yi ayoktsübaji Naga nunger lokti tentet lenirtemibo kangasa nüngdaka repringteter. Ajisüaka, Dimapur nung Baptist Sannükertem Telungjem aser Baptist Tetsürtem Telungjemibo Dimapur kisüng nung yi ayoktsüla ta takangba agüja alibaji mebilemdangi aser merajemi inyakba mapa ka asütsü, iba jagi kija taküm, kibong aser lokti nung kecha tajung bener marutsü ta parnoki bilemer. Atangji, tang tashi nung Nagaland nung yi ajemertemibo yi yokang ta ashiba mangashi saka lokti lenirtemi dang yi ayoktsüla ta yi ajemertem taküm aser kibongtem meimja ashir amaika angateter. Ibaji kodang bilemdangdir, Laishiba nung Apijemtsü Shin 31:6-7 nung, "Samatsü renema alir nem temesepba yi agüjang aser taküm nung kurema alir nem yi agüjang. Parnok yi jemdakjang aser sensak tia amadakjang aser parnok timtem ano tali tebilemtetdaksü," ta ashiba sayutsüngi o nenshia metetdaksür amai angateter. Ajisüaka, ibai shitakba temeim o masü saka teimla makaba o lir. Atangji, tanü Nagaland nung Naga nungertem ya teimla makaba purtem amai lir, anungji parnok timtem aser shisabolu amadokdaksütsü asoshi yi jemdakjang ta Laishibaia ashir südi. Ajisüaka, Naga nunger shisaluin bushiba nung tashitemetet akümtsü aser rongsen bushiba nung alirongsen tsükteta takar akümtsü asoshi yi ayoktsüla aser yi ajemtsüla ta ashirbo masütsü. Teimla maliba nübortem asüyonga, shiba tsüraburibo pei chirnurtem dang yi yangluang, yi yokang aser yi jemang ta ashitsü ? Atangji, Dimapur nung lokti tentetemi Dimapur nungbo yi ayoktsüla ta akangbaji, shitakba nung, yi yokdaksüner aser jemdaksüner masü saka Nagaland nung yi meyanglutsü aser mayoktsü ozüng lateta aliba ama shitak mapa kuma inyakdaksüner asütsüa akok. Ibaji kodang bilemdangdir, Nagaland nung yi meyanglutsü aser mayoktsü ozüng yangluba ozüng madak ya kibur mali, shibai yangluar memetet, iba ozüng ya latetba sülen Nagaland toktsür ao amato, ozüngbo latet saka mapa kuma inyaker mali kümogo. Aji oda, tanübo Nagaland nung yi nokdangtsüba department kima aser police station anasa dang yi ayokertema sademsadema ayokba angur. Yamaji masütsüla ta tanü Nagaland nung yi nokdangba tongpang nung nokdaka alirtemi ayimtener. Atangji, Nagaland nung yi ayokba tesemtemji police station anasa dang masü saka tenla ki anasa aser arogo nung lenirtem anogo shia ajanga süidak tesemtem nung ayoker. Ashi akok nungbo, asenok pastortemi anir arogo nung lenirtema item yi ayokdak ajanga süi shiaji anogo shia khi anener oagi sarasadem mapang aginütsüka, sarasadem kanga nüngdakba tesemji yi ayokba tesemtemji lir. Aji oda, ozüng agia makoker süra sarasadem agibo akoktsü ta amanga asenoki 'Yi Kidang Sarasadem' sentong ka tenzüksüla. Arogo nung lenirtemi tang amaji yi meyanglutsü, mayoktsü aser majemtsü nokdangbaji shitak, kodaser arogoi arogo nungertem dang yi yokang aser yi jemang ta ashitsü, anungji arogoi yi nokdangba atema shingaia arogo maitsütsüla saka pusema nokdaksüla. Ajisüaka, arogo nung lenirtemi metettsüba kaji, arogo asoshi yi tongpang nung raratsüba hadirji "Press Release" masü, yi ayokba ki mita aobajia masü mesüra yi mayoktsüla ta longkak aibtajia masü saka yi ayokba aser yi ajemer kiji arogo nunger sarasademba ki akümtsüla. Nagaland nung yi meyanglutsü aser mayoktsü ozüng zünga lirji, ozüng raksartem mita aotsü aser pua merenshitsübaji yimten mapa aser lokti lenirtem mapaji nübortem nem tangatetba tajung agütsütsü aser yimten mapa akangshidaksütsü aser arogo mapaji anogo shia yi ayokdak aser yi ajemdak ki tonga orr sarasadem mapang agitsübaji asütsü. Aji oda, koba mapa südir süaka, kati ka maitsütepi peisasa pei mapa meteta inyakra, tenem agia lenden kuma inyaktettsü.

OLEMSABANG

O kanga kümdanga azüoka jembitsüla

~ L. Kika Pongener.

O ya Tsüngrem lir; anungji o ya azüoka kümdanga dang jembizüka yoktsüla.

Tashitemeteteri ken o kanga junga shisadanga kümdanga dang jembizüka yoker.

Tantsür-tambur aser pei tsürabur den o akümtsübua kanga kümdanga jembitsüla.

Jembiteter ta ser o tali-tapong tejembi; nai jembiba o nung kenu na metsüdaksü.

O aika jembiba agi masü; saka o kümdanga jembiba agi dang temeteter shisanger.

Tashitemeteter-i ken o tebilemtetba ajak-bo mejembir; o karbo meyokzüka yoker.

Ken o kwika talila jembir; paikaji aibelen adener aser nisung dena tsükchitep adener.

O agi tembar ayimer aser o agi tsükchir ayimer; anungji o kanga azüoka jembitsüla.

Langzüteter ta ser ken o ajakbo melangzütsüla; karbo aremzüka melangzüi yutsütsüla.

Aseni jembiba o agi asen tashitemetet shisanger; aser ano mashi-memeteta shisanger.

Shibaisa pei tebang aser temeli azüoka yuteter; pai timtem nungi pei taküm soita ayur.

O tesashi agi ain adokdaksür; saka o tanemi anep-anepa jembiba agi mit sunepdaksür.

Tamashir-i meshisadangi tapi-tapi agi jembir; saka shisa akari kanga kümdanga jembir.

O tanep jembiba agi nisung pelar; saka sepra-sepra-a jembira nisung mulong yirudaksür.

Lokti madak lennir kati ajak nung tebang mejushitsüla; kar-kar nungbo tenuk amuotsüla.

Lokti madak lennir-i ajak nung tebang jushira; pa/la atema jong tongloktsür kata malitsü.

Tashitemeteteri tarutsü indang bilemdanga jembir; saka tamashiri tanü ajung asaa jembir.

Tamashir kati tilaka metetbaji kanga tuluka metet amai bilema asüküma o tulu-lu jembir.

Tashitemeteteri pei sasa ilaa bilema kanga ajemalua tila kuma ken o kanga azüoka jembir.

O belenshia jembiba aser tutepa jembiba agi tembar tajung tsüngda tsükchitep dendaksür.

Tiyazü o-lulu pura-pojia jembiba agi; lokti nung teraksa, telemsa aser lendong adokdaksür.

Mashibangi jembiba agi noklang-nok agi settoktsüba ama nisung mulong zübo keta yirutsür.

Ochi kuli agütsüba agi nisung kümzüker; saka tiyazü kuli agi nisung taküm ka tepsetdaksür.

Shisa akar temeli agi taneptsü bena arur; saka shisa makar temeli agi rarapangsen adokdaksür.

Tiyazü o-ji khi anoshi dang aser arishi tatsü; saka ochi o-ji teti asoshi putu aika arishia alitsü.

Anemtsü agi mesuzüka nanga jembir dang nungi; indang-indanga arrtsüri maongka tali angutsü.

Anemtsü agi sanga jembiba dang nungibo, indang-indanga metongshitsüba kanga agia tajungba.

Mesuzüka o tanang jembiba agi teraksa adoker; saka ochi o indang-indanga jembiba agi yanglur.

Jembiteter ta ser o tali-tapong tejembi, asen chirnur aser semchi-semnur jembitsü anunga yujang.

Tsüraburi tangar ariokja jembira; chirnur aser semchi-semnur tebang nung temeli masem sotettsü.

O agi temoatsü bener arur aser o agisa atakatem bener arur, anungji o kanga kümdanga jembitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nicaragua nung pastor Rudy Vargas ita trok sülen chiokogo



January 18, 2026: Political Prisoners-i sangdong ka ajanga pastor Vargas, par kibong züngsemtem aser Mauricio Alonso Estrada nung densema nisung 20 January 10 nü chiokba metetdaksü.

Ajisüaka Pastor Vargas, par aianu Jessica aser Armando José Bermudez Mojica nung densema nisung 20 January 10 nü chiokba metetdaksü.

Police aser volunteers-i mita aoba mapang nung pastor Vargas den par aianu Jéssica Palacios Vargas, pa kinüngtsü'er adianu ana - Pedro José López aser Armando José Bermudez Mojica na aser par medemer Mauricio Alonso Petri nung pua liasü.

Kasa anogo nungjisa Petri'er jabaso aser Pastor Vargas'er Arogo nung worship team nung züngsem, Mauricio Alonso Estrada aser Vargas'er medemer Olga Marķa Lara Rojas nata apu.

Nicaragua nung Mechanism for Recognition of

house arrest asüba ya tim masü. Onoki Nicaragua sorkar dang telatetba kecha makai parnok nem temeden agütsütsü, iba denji külemi Pastor Efrén Antonio Vñlchez López densema tanüngba nisungtema tangsa chioktsü akhanger," ta metetdaksü.

"Onoki alima linüktem dang iba linük nung meimchir temeden agütsütsü atema Ortega-Murillo-i aniba sorkar rongshitsü aser aibelenertem nem temerenshi agütsütsü akhanger," ta lai metetdaksü.

2018 küm Nicaragua nung nüburtemi sorkar anema sashia longkak aitba mapang sorkari tashiyim amshia liasü. Nüburtem dak tashiyim amshiba atema Pastor Lopez-i sorkar sashia aitsüba sülen 2022 küm May ita nung pa apu aser pa küm 23 tashi tepuokdak ayutsü atema obendang agüja liasü.

PFI indang evangelism program renemer million 1 jungogo

January 18, 2026: Küm ter tejaklen Prison Fellowship International (PFI) ministry-i tepuokdak alirtem atema prison evangelism program ka tenzükba sülen iba program renema graduate asür million 1 jungogo.

Taoba hopta PFI-i, alima tesem balala nung tepuokdak alir million kati hopta 8 course 'The Prisoner's Journey' renemogo, ta metetdaksü.

2014 küm tenzükba course ya osangtajung Mark kakat nung ajemdaker renemba course ka lir. Iba program ya continent balala nung aliba jail aika nung agir.

Prison Fellowship International-i ashiba agi, iba program ya alima tesem balala nung aliba jail 500 dak tali nung agir aser tang tashi nung tepuokdak alir 1,010,621-i iba course renema agiogo. Iba course renemertem nem pei oshi nung Laishiba kaka agütsür aser iba course

renemer shilem 70 dak temaibo maneni evangelism mesüra discipleship program agidar.

Prison Fellowship International Tir aser chief executive officer, Andrew Corley-i, iba alizüng tongtetba ya ajanga tepuokdak alir aika taküm melenshiba jangjar, ta ashi.

Corley-i, "Iba ya züngya ka dang masü. Nisung million 1 graduate asüba atema onoki pelateper. Alima nung tesem tamajungtiba kar nung tetsür-tebur million kati Yisu Khrista ajuruogo," ta metetdaksü.

'The Prisoner's Journey' course ya jail telung nung telok tilala lemsar agir. Hopta shia tepuokdak alirtemi Yisu Khrista taküm otsü aser Pa tesayubatem bushir.

Baylor University-i ashiba agi, PFI indang The Prisoner's Journey course ya nisung aikati agir aser iba ya ajanga pei taküm nung tetezü jangjar,

ANOGO ABEN TSÜNGREM DEN

Pa tamang katetba lir

Pa tenangzükbatem O ka tanga tamakok maludaktsü (1 Chuba 8 : 56)

Tenangzükba ka tanga tamakok aludaktsura tangaji-a koda? Aji makangra lenmang ajakji anakshitsu, jajatsu ratatsu. Tsüngrem tenangzükbaji raksara tepela ajak samatsu. Saka o kata tamakok malu. Tzümetsüng mapang nung lenmangji meraksa. Kotak nung tepela tsüngtsüng shitak dang atem, aser kin ajak sentsuwangshi agi sünga lir. "Tsüngremji tamang katetba, aser pai aji inyaktu."

"Tsüngrem temeim lir." Aser "temeim kodanga majener." Ayaterem nung milenji kodanga maseper. Arem nung ayongi asenok nem teti tzü agütsur. Temulung makai akumdang tesüneptsu o agi kodanga anunga mekumdaktsur. Temeimi teti kechisarena" ajak renema atar. "Pai nangzüker, pai meinyaktu asu?" Kotak nung ain ajaki taochi tenangzükba tilatiba kaji atalokdaktsutsu nangzüker. Asenok kodanga metoktsur." Tsüngremi pei sasa kulakoktsutsu makok. Pa tenangzükba o ajak mapang shidak nung atalokdaktsur, aser ku Tsüngrem tashi nung ni takar küma alitsu.

Khristan kibong aikati Israel toktsür aoer: Israel Tir Herzog



January 18, 2026: Israel Tir, Isaac Herzog-i, kijung lanu Khristan kibong aikati Israel toktsür aoba atema tebilemtsü akar, ta metetdaksü.

Tawa sentong ka nung yimsü lenirtem aser Israel nung Khristan denomination balala nungi lenirtem den jembidang Israel Tiri, "Iba linük ya kü meyong asüba ama parnok (Khristan) meyong aser asenok ajak meyong," ta ashi.

Paisha, Israel nung Khristantem kümzüka alitsü atema inyaktüsüji kanga tongtibang, ta ashi.

Tirisa, 'Abraham Accords' tangatetba ya Abraham nungi jakzükba chirtem aser Tsüngrem chirtem ajak tesünap nung azükarua alitsü atema lir, ta ashi.

Paisha, region tesem ajaklen tai toktep aser tesünap alitsü atema inyaktüsüji yimsü lenirtem teinyaktsü mapa lir, ta ashi.

Kasa sentong nung Israel nung Council of Churches tongti, Greek Orthodox Patriarch Theophilos III-i, Israel aser Hamas na tsüngda rara anenba atema pelar, aser iba ya ajanga teti asoshi yimjung alitsü imlar, ta ashi.

Paisha, Israel nung Khristantemi maneni ajak junga

alitsü atema inyaker, talisa tanurtem, tetsürtem, kanga t a n t s ü r - t a m b u r t e m , shirangertem aser yirua alirtem tenzüker, ta ashi.

Iba dak sendakba nung pai, Gaza nung cancer tashidak agi shiranger tanurtem Yirusalem nung aliba Khristan hospital, Augusta Victoria Hospital nung yarir, ta ashi.

Theophilos-i, "West Bank aser Yirusalem nung yimsü alia amanger telok balala poktetba ya tebilemtsü onük ka lir. Nüburtem külemi tesünap nung litettsüsa inyaktüsü nüngdak. Asenok ajaki ajangshiba amokmeren balala koktettsü atema asenoki maneni inyaktüsü," ta ashi.

O tembanga Theophilos-i Israel Tir dang, Arogo nung lenirtemi yimjung aser tai toktep atema maneni inyaktüsü, iba denji külemi Yihuda nung sempaba anema inyaktüsü, ta ashi.

Herzog aser Religious Affairs Ministry director general Yehuda Avidan napronglai Khristantem dang, Israel-i maneni Khristantem aser temeshi tesemtem kümzüksü aser ajaki sadoksadoka tekülem agitettsü atema inyaktüsü, ta ashi.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tuagi

(adv) tekalen, tenemlen (up there)

* Onoki tuagi tenem kolak nung kangki ka yutsü.

Tuet

(v) temeyong mesüra süng agi nungit (press or pointed with finger or stick)

* Watibai süng tila ka agi tueta lia ni tanemi süngjangji agizük.

OLONG PAITEP # 7388

1		2			3		4		5
				6		7			
8									
						9			
			10						
11									12
					13			14	
15									
16								17	

TIPIEN

1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7387 TELANGZÜBA**TIPIEN :**

1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER

Jamaica nung square mile shia tenla ki teimtiba lir ta Guinness World Record ka nguogo. National Library of Jamaica ajanga adokba data nung square mile shia tenla ki 2.75 shi lir aser iba ya asetkong nung Khristan maitsü tera yanga aliba ajanga lir ta Pure Jamaica Media-i ashir. Jamaica tasazük ya 4,244 square miles shi ka lir aser iba asetkong nung officially registered churches 1,600 tema lir. Tenla kitem ta Baptist, Catholic, Anglican, Seventh Day Adventist aser Pentecostal dena Christian denominations 100 dak tema indang lir.

Pradyot Kishore Manikya-i Chakma nunger tekolakba tushi**Agartala, January 18, 2026**

(Agencies): Tipra Motha Party (TMP) founder aser chuba jabaso Pradyot Kishore Manikya Debbarma-i January 17 nü Chakma nunger "pradhan samapajati" (community head)

nem silver coin ka aser ceremonial sword ka agüja tushio.

December 27 aser 28 anogotem Chakma nungeri samapajati tasen ka shimba sülen Pradyot-i January 17 nü

iba tetushi agütsüogo.

Chakma nunger teshimtet telok chuba kidangi aruba pelashishia agizüker aser Chakma nungeri mapang talangka sobaliba benshia aruba asoshi pelar ta Pradyot-i ashi.

Chakma nunger pradhan samapajati-i Pradyot den Chakma nunger shisaliok, oshi aser sobaliba wazüka ayutsü aser renloksü indang onüktem benoka lemsatet.

Tipra Motha lenisüba aser Chakma nunger tsüngda tesentaktep akangshiba kanga tongtipang aser Tripura Tribal Areas Autonomous District Council (TTAADC) nung külemi yaritepa aotsü asoshi tajung lir ta political observers-i ashir.

Chakma community council indang kümsük taküm April 18 nü tembangtsü.

Amit Shah-i Dibrugarh nung Assam Assembly complex lung azüngtsü**Guwahati, January 18, 2026**

(Agencies): Union Home Minister Amit Shah-i January 30 nü Dibrugarh semdangtsü aser Assam nung Legislative Assembly complex tanabuba yanglutsü atema lung azünga yutsütsü.

Amit Shah-isa Khanikar Stadium redevelopment 2nd phase renemba lapoktsütsü ta Chief Minister Dr Himanta Biswa Sarma-i ashi.

Dibrugarh nung Assembly complex yangluba ya Assam

nung tanabuba yimtiba ama renlokba nung alizüng ka asütsü. Iba complex renemba sülen kümshia Dibrugarh nung Assam Legislative Assembly indang session ana alitsü aser tanüngba anaji Guwahati nung agitsü ta CM Dr. Sarma-i ashi.

Sorkari ketdangsubaren decentralising asütsü aser sorkar ketdangsuba nung Upper Assam-i shilem tuluba agitsü nangzükba sayur ta Dr Sarma-isa ashi.

Union Home Minister Shah-

isa Khanikar Stadium redevelopment project mezüngbuba shilem renemba lapoktsütsü.

Iba stadium nung seating capacity 5,000 aliba nungi 35,000 shi akümtsü aser Assam nung multi-sports stadium tulutiba rongnung ka asütsü. Iba ajanga sports development ajungkettsü aser Dibrugarh ya administrative aser infrastructural hub tongti ka akümtsü ta CM Sarma-isa metetdaksü.

Dhanamanjuri University nung mezüngbuba convocation agiogo**Imphal, January 18, 2026**

(Agencies): Manipur Governor Ajay Kumar Bhalla-i Dhanamanjuri University (DMU), Imphal nung mezüngbuba convocation ceremony ketdangsüa agiogo.

2018 küm university jenjang nung ajungketba sülen taküm mezüngbuba convocation agiogo aser academic years 2020 nungi 2024 tashi undergraduate aser postgraduate students nem degree balala agütsüogo.

"Iba sentong nung graduate

asüba kaketshir aika adenba atema pelar. Convocation ya academic ritual ka dang masü saka merangba, angazükba aser takok anguba indang benjung ka lir" ta Governor Bhalla-i ashi.

Dhanamanjuri University-i tesüiba küm ishika tsüngda terenlok kanga nguogo ta pai ashi.

Alima kanga kara ainba putu ka nung university temi tongti shilem agir. Higher education rejutemi kaketshirtem nem academic knowledge dang masü saka adaptability, ethical

judgement aser lifelong learning agütsütsüla, ta Governor Bhalla-i ayongzük.

Manipur sorkari DMU tajungba kümdaktsütsü tenangzükba lir aser graduate asüba kaketshirtemi loktiliba aser linük bendanga agüja tenzüksü ayongzüker ta paisa ashi.

Iba sentong nung Chief Secretary Puneet Kumar Goel, Ministry of Education, Government of India Secretary Vineet Joshi aser Dhanamanjuri University Vice-Chancellor Prof W Chandbabu nunger aden.

Karachi shopping mall mi lendong nung nisung 6 asü



Karachi, Aenjeti/January 18 (Agencies): Karachi kübok shopping mall ka nung mi adokba sülen nisung trok asü aser 20 yiruogo, ta Pakistan nunger ketdangsürtemi metetdaksüogo.

Iba mi lendong ya Honibarnü Gul Plaza shopping mall nung atalok aser ghonda aika ronga liasü. Iba complex ya nisung kanga mazüngi inyaksangshiba tesem ka lir. Deobar anepdang tashi nungbo mibenertemi mi shilem 30 bo azüokteter liasü ta ketdangsürtemi metetdaksü.

South Deputy Inspector General Syed Asad Raza-i Dawn osang kaket dang ashiba agi, lendong nung asür ya mezüngbo asem dang jangjar liasü saka pongu kümogo. Medical complex Edhi

Foundation-i mapang tatsüka lir ano nisung trok asüba sangdonga liasü.

Teküzmükertemi ashiba agi, iba mall nung dokan 1,200 shi lir aser iba ajanga ano nisungtem dokantem nung sabanger alitsü ta tsübua bilemer. Edhi Foundation-i ashiba agi, mi kanga sashiraba agi ki shilem ka chirep aser iba ajanga teküzmükba maparen nung tetsükdaksü adoker.

Garden subdivision police officer Mohsin Raza-i ashiba agi, bushisüngdangba sülen mi ya dokan ka nung short circuit ka asüba nungi adok aser iba sülen complex ajungai prokshia ao.

Paisa, ken o kanga junga bushisüngdangba sülenang mi ya kodaser adok aji jangjatsü ta ashiba den teraksatsüba

tuluba madoktsü atema ki ya kümzüka ayutsü nüngdaker, ta ashi.

Tir Asif Ali Zardari aser Ato Kilonser Shehbaz Sharif nati asürtem den asükhulemsatepogo.

PTV sangdong ka ajanga ashiba agi, Sharif-i nisung taküm aser ki o jen kümzüka ayutsü atema takokba tashi jenjang agitsü, lendong agi kongshir aliba shishilembartem nem teyari agütsütsü aser yirur alirtem nem medical teyari agütsütsü tetuyuba agütsüogo.

Zardar-i, Sindh province sorkar dang takok tashi takaratiba nung teyari agütsütsü mepeshiba den yirur alirtem nem takokba tashi medical facility tajungtiba agütsütsü asoshi lenmang ajak bushia jenjang agitsüla, ta shisem.

25th

Anniversary of the
KOHIMA PRESS CLUB
"Traversing 25 years of Storytelling:
Inspiring the future"

20th January 2026 | Capital Convention Centre, Kohima

SANGEETA BAROOAH PISHAROTY
President, Press Club of India
will grace the event as Guest of Honour | 10:00 AM

Northeast Media Conclave
Theme: "Reimagining Truth:
Northeast Journalism for a Changing World"
12:30 - 3:15 PM

Dr. NEIPHIU RIO
Chief Minister of Nagaland
Special Guest, Valedictory Programme | 3:30 PM

Donald Trump ya ozüing alemer ka lir: Ayatollah Ali Khamenei



Dubai, Aenjeti/January 18 (Agencies): Iran nung longkak aiter bhukumba atema US Tir Donald Trump ya ozüing alema inyaksangshir nisung ka lir ta Iran indang Supreme Leader Ayatollah Ali Khamenei Honibarnü nüngja agütsü aser nisung aika asüba atema longkak aiter tenüing asen.

State television ajanga broadcast asüba nung Khamenei-i, longkak aitba ajanga nisung meyirijang aika süogo ta ashi, koba December 28 nü nungi tenzüka longkak aita aser iba yong nisung aika pua merenshiba nung nisung asüba indang Iran leniri ola adokba ibai mezüngbuba alitsü.

"Iba yimli anema nokdakba nung US tiri yimsüsür anema nokdaknua aliba nüburtem dang meratai aotsü ajungmeso aser 'Nenok den onok lir, mitkaria

nenok yaritsü' ta ashi," ta Khamenei-i ashi. US-i Iran indang rongsenketzüng aser yimten amokbangtsü meranger, ta pai maneni tai tongloksü.

"Nisung asü-amaba aser teraksa bener aruba, Iran linük anema tai tongloksüba mechi onoki US tir ya ozüing alema inyaksangshir ka ama züngshir," ta pai ashi. Pai longkak aiter ya United States indang "foot soldiers" lir ta ashi aser parnoki mosques aser educational centers raksatsü ta ashi.

"Nisung mulungjang yiruja, parnoki nisung meyirijang aika tepset," ta ashi.

Yangji telangzüba agüja Trump-i Khamenei küm 40 jungnüa yimsü asüba tatem kati arudaksütsü ayongzü.

"Iba nisungba ya shiranger, shibai par linük tiptema yimsü asütsüla aser nisung tepsetba

anentsüla. Lenisüba sempet tajung maliba yong alima nung par linük ya tamajungtiba lir," ta Trump-i Honibarnü Politico den sensaksemba mapang ashi.

"Iran nung lenir tasen ka bushitsü mapang tongogo," ta pai ashi.

Aji masüadang Trump-i tera atsüanem akaba yimya nung jembidang, "Iran-i nisung 800 dak tema alenseta südaksütsü aliba athi. Parnoki athiba atema ni akhum agütsür," ta ashi.

Longkak aiter alenseta südaksütsü aliba sentong jangjatsü atema pai Iran nung shiba den jembiar mashi. Pai iba ama jembiba ajanga mitkari amaksü aliba nungi asetshiba yimya ka amai ajiteter.

Longkak aiter 800 nem tasüba temerenshi agütsütsü aliba athiba atema Trump-i jembiba nung Tehran Prosecutor General Ali Salehi-i, "Trump-i teti tamakitsü aser mapetba o jembiar. Onok yimya tesashi, kumzüka yutettsü aser teker a lir," ta ashi.

Tawa Trump-i longkak aita aliba Iran nunger dang "teyari arutar" aser longkak aiter tepsetba manenra mesüra Iran ketdangsür temi pula aliba longkak aiter tepsetra par administration-i tapet mera agitsü ta shia liasü.

Khamenei-i jembidang, r o n g r o n g s h i r o n g

adokdaksürtemi bendang lima nungi bener aruba nok-nü bena lir, ta ashi.

"Onok sentong mali, onoki linük rarai anir maor. Saka kilung nung aibelener mechioker, kilung nung aibelener dang tamajungba; international jenjang nung aibelener lir. Onoki parnok kisüing metoktsütsü," ta pai ashi aser ketdangsürtem dang ken o maneni bushitsü ajungshi.

Iran rongsenketzüng jenjang tamajungba akumba mechi December 28 nü nungi tenzüka longkak aitba azüoktsü teka tesashi amshiba sülen Iran nung anisüngzü

makai süngjema lir. Longkak aiter pua merenshiba mapang nisung 3,308 süogo, ta US nung amenoka aliba Human Rights Activists News Agency ajanga ashir.

Longkak aitba tsütsü küm aika iba agency osang ya shidak alir, shirnoki Iran nung activists indang network nung metaloka alir, shirnoki nisung asü-amaba ajak osang tejangja agütsür.

Iran ketdangsür temi par linük nung mepetmesü adokdakba atema United States aser Israel tenüing asener. Hokulbarnü Iran Tir Masoud Pezeshkian-i phone ajanga Russia Tir Vladimir Putin den jembidang

mepetmesü adokba tetsüngtai US aser Israel aiter ta tai tongloksü.

Tehran nung anogo ishika longkak aitba mali, kong akhi ama shishilempaba aser inyaksangshi lir, aser Iranian state media-ia mepetmesü tasen adokba osang sangdonga mali.

Longkak aitba mapang ketdangsürtemi January 8 nü internet ajunga shibangtsü. Honibarnü Iran linük tesem kar nung text messages aser internet services kanga tatakzük amshiteta liasü.

Hokulbar aonung nungi cellphone text messages amshitet aser domestic internet service ajanga local websites tem amshiteta liasü. Virtual private network (VPN) ajanga international internet services kari amshitetba osanga lir.

Bendang lima nung jenoka alisang Iran Crown Prince Reza Pahlavi-i ano Honibarnü nungi Hombarnü tashi longkak aittsü ayongzü, saka Honibarnü nikongdang tashinung pai ayongzüka tashi angar meliasü.

Pahlavi tebu ya 1979 Islamic Revolution nung atsüngdok, aser pa ya bendang lima nung prokshia aliba monarchists temi kanga yarir, saka Iran telungzü

kimong memesemteter.

Lin Chun-Yi, An Se-Young nati India Open kokogo



Aenjeti/January 18, 2026

(Agencies): Taiwan nunger asayar Lin Chun-yi-i Deobarnü India Open tebur kija asaya kokogo. Asayaba tesem nung condition majungba atema taitsuba aika adokba asayamung ka nung Lin-i takok ngutetogo.

Arishi kum 26 tain Lin-i Indira Gandhi Indoor Stadium, New Delhi nung final asaya nung Indonesia nunger third seed asayar Jonatan Christie 21-10, 21-18 agi minute 38 nung koka liasü, koba pa indang career nung title tulutiba asütsü.

Tetsür kija asaya final South Korea tsür world number one An Se-young aser China tsür second-ranked Wang Zhi Yi na asaya koba Se-young-i 21-13, 21-11 agi koka liasü. October ita Denmark Open akokba sülen An-i tang agi asayamung trokbuba atonga kokogo aser asaya 30 tashi khien danga tamakok mongui asaya arudar.

Badminton asaya jenjangbo temaba jenjang nung liasü, saka asayaba tesem dak sendakba nung mepetmesü aika adokogo.

Hopta tepeyong asayartemi tebilemtsü balala lemsatepogo. Denmark tsür Mia Blichfeldt-i World Tour Super 750 asayamung nung asayaba tesem memerekba indang ashishia liasü.

"Asayaba tesem jenjang majungba agi ajak tezü adanger," ta Blichfeldt-i social media ajanga ashi. "Mezüngbo odang sentoka toktsütsü merang saka tatem nungbo iba ya temenenetsü kecha maket aser asayartem atema tim masü."

Rank 20buba nung alila Blichfeldt ya tanabuba round nung tsüka liasü.

Iba ken o hopta tepeyong atsür aruogo. Honibarnü semifinal asayaba mapang ozü tesepe ka nungi jana court nung

tsük aser ozü scü tsüshia aliba ajanga merekmeju dak sendakba nung tashishiba agüja liasü. Television footage ajangsa shitsü ka stands nung senzua aliba nguogo.

Denmark nunger world number three asayar Anders Antonsen-i India yimtiba mopung kanga temenen asüba agi iba asayamung nung masayatsü telemetba agi.

August ita Badminton World Championships aser 2030 kum Commonwealth Games ayongzüka asayatsü atema India renemba mapang aser 2036 kum Olympic Games ayongzüka asayatsü tejangraba aliba sangdonger aliba mapang tang iba taitsuba ya adokogo.

Taitsuba dak sendakba nung telangzüba agütsüba mapang Badminton Association of India secretary Sanjay Mishra-i, "ken o kar adokogo, saka ajak bentettsü koka lir," ta ashi.

T20 World Cup ken o: Bangladesh-i Pakistan dang teyari meshi

Aenjeti/January 18, 2026

(Agencies): Bangladesh team India nung World Cup asayatsüba ken o mebentetra Pakistan-ia 2026 ICC T20 World Cup nung asayatsü asoshi asadangshitsü akok aser iba ajanga ken o tebenjaba kümdaktsür.

Source-i NDTV dang ashiba agi, Bangladesh Cricket Board (BCB)-i security dak sendakba nung India-i oa World Cup asayatsü memulungba sülen Dhaka-i Islamabad dang diplomatic aser cricket asaya dak sendakba nung teyari meshiogo.

"Bangladesh sorkari Pakistan nung ketdangsürtem den tongtepratepa T20 World Cup nung parnok shilem agitsüba dak sendakba nung teyari meshiogo aser telangzüba tajung nguogo," ta source kati ashi. "Pakistan-i onok dang Bangladesh ken o mebentetra parnoka iba WC nung masayatsü atema asadangshitsü akok ta shiogo." International Cricket

Council (ICC)-i tensa azüoktsü merangba mapang tang iba terenlok ajanga ken o tebenjaba kümdaktsür. 2026 T20 World Cup ya February 7 nü nungi tenzüka India aser Sri Lanka na nung asayatsü lir.

Dhaka nung taoba kum August ita mepetmesü adoka taoba PM Sheikh Hasina atsüngtokba sülen Pakistan aser Bangladesh na tesendaktep junga kumogo. Hasina ya India-i jena ao aser Bangladesh-i la meyipa yoktsü mepeshiba tang tashi magizükba ajanga linük ana tsüingda tesendaktep tamajungba kümdaktsüogo.

Islamabad aser Dhaka na ita tsüingda cricket asaya dak sendakba nunga tesendaktep junga kumogo. Board ana ya taoba kum Asia Cup mapang sendaktepa inyak aser PCB mendenbuba Mohsin Naqvi nem BCB tir Aminul Islam-i teyari agüja liasü. Meyiper Naqvi-ia, asayamung matenzük tsüingda Bangladesh-i Asian Cricket Council senden

ka ayongzüka pusema liasü.

ICC-i security dak sendakba nung amokmeren kecha mali ta shiaka Bangladesh-i World Cup atema India-i team meyoktsü lemtetba ajanga mepetmesü adoker lir. ICC den Honibarnü sensaksemba sülen BCB-i, ken o dak sendakba nung sensaksem nung maneni shilem agitsü ta ashi, saka parnok tamendakdak memelenshi.

Kolkata Knight Riders-i Bangladesh pacer Mustafizur Rahman chiokba sülen India aser Bangladesh na tsüingda tensa mejungi aküm.

Iba sülen mapang tatsüka dang lir BCB-i ICC dang parnok India nung World Cup masayatsü ta ashi aser tang tashi iba tamendakdak nungi masetshi-i lir.

Tang Pakistan-i Bangladesh pusemba ajanga ICC tali nongshidar. Full Member linük ana iba asayamung nung shilem magiba ajanga mepetmesü adoktsü.

A02026: Carlos, Sabalenka tanabuba round-i iogo

Aenjeti/January 18, 2026

(Agencies): World No.1 Carlos Alcaraz-i Australian Open kanga tashi ita tenzüka Deobarnü Australia nunger asayar Adam Walton straight sets nung koka iba asayamung akoktsü timla aliba mesamai lir.

Arisihi kum 22 tain Spain nunger asayar yagi iba asaya 6-3, 7-6, 6-2 agi akok. Tena tsüingda asaya ghonda ka ser minute pongu asaya liasü.

Alcaraz-i tang tashi nung Grand Slam pezü nungi asembo koker lir, saka Australian Open ya tang tashi mekokteti lir. Pai iba asayamung ya kokra pa ya Career Grand Slam ajanzüketba asayartem rongnung tanobusang akümstsü.

Kasa asayamung tetsür kija asaya nung Aryna Sabalenka-i mezüngbuba asaya kokogo. Deobarnü world No.1 asayar yagi asayanüba amabo junga masayateti aibelen aika mena saka lai France tsür Rakotomanga Rajaonah 6-4, 6-

1 agi kokogo.

Terprangtsübo lai teti ama asaya ayong ayonga akok ama reprangteter saka court nung settle süa asayatsü mapang agia liasü.

Taoba kum final nung Keys makokba sülen Sabalenka kum pezü tsünga tang agi Australia Open tasembuba akoktsü merangdar.

Tetsür kija asaya nung Venus Williams-i otsü tasen ka yanglua la ya Australian Open nung asayaba asayartem rongnung tantsütila aküm. Arishi kum 45buba nung la nem wildcard ka agüja asaya saka lai asaya makok.

La nem wildcard agütsüba atema aikati ashishio, saka Venus ya noksa atema dang masü asü aser lai kanga junga asayaogo.

Arishi kum 24 tain Serbia tsür Olga Danilovic den asaya ya Williams-i kanga meranga asayar 6-7 (5/7), 6-3, 6-4 agi mekokki liasü.

Daryl Mitchell-i otsü tasen ka yangluogo



Aenjeti/January 18, 2026

(Agencies): Daryl Mitchell-i Deobarnü (January 18) Holkar Stadium, Indore nung India den tang iba asayamung nung tanabuba century yangluba sülen pa ODI asaya nung batter tem rongnung temaba jenjangi atutsü jangjaogo.

New Zealand nunger batter yagi iba asayamung nung mezüngbuba asaya Vadodara nung asayaba mapang run 84 yanglu aser Rajkot nung tanabuba asaya nung out mesüi run 131 yanglua liasü. Deobarnü pai run 137 yanglua liasü.

Mitchell-i India den India nung asayaba mapang ponguben tashi run 50 dak tema yangluogo aser item rongnung pezübo century liasü. Iba asayamung nung masaya tsüingda pai 2023 World Cup nung century ana yanglur liasü. Pai Dharamshala nung league stage nung run 130 yanglu aser Wankhede Stadium nung semi-final asayaba mapang run 134 yanglua liasü.

Mitchell-i India nung India den asayaba mapang century pezü yangluba ya puti otsü nung

India nung India den asayaba mapang century timtiba yangluba rongnung tanabuba lir. South Africa nunger asayar Ab de Villiers (ABD)-i dang India den asayaba mapang century timba yanglua lir. Taoba asaya nung Mitchell-i Nathan Astle-i yanglur aliba record ajateta India nung India den asayaba mapang century timtiba yangluba New Zealand nunger asayar aküm.

India nung India den asayaba mapang South Africa nunger asayar Ab de Villiers-i asaya 11 nung century 5 yanglur lir aser pa sülen Daryl Mitchell-i tang century pezü yangluogo.

Kasa mapang nung Daryl Mitchell-isa kum 46 tain record ka ajatetogo. Pa ya puti otsü nung bendanger asayartem rongnungi India nung asaya asem asayaba asayamung ka nung run 300 dak tema yangluba mezüngbuba asayar kumogo. Iba record ya Sri Lanka nunger asayar Roy Dias-i 1982 kum yanglua liasü.

Mitchell-i iba asayamung nung run 352 yanglu aser pa indang average 176 liasü.

BILEMDANGANG

"Nagsangatema agi nisung ka atsüzüker."